


處州府志卷之十二

處州府知府黃平曹掄彬重修

人物志

篤行  
尚義



文章者道德之餘士不能以功業顯而文可華  
國學可章身絃誦出金石之聲詞賦躋屈騷之

室者恬郡亦自有足述也豈可令其湮沒耶

祝顏字景深麗水人大觀中舉入太以舍選登進嘗試  
孟軻勇于義賦膾炙人口時號祝孟軻終宜教郎

祝孟軻

姜特立字邦傑麗水人靖康中父綬死于難補

四舉禮部孝宗名試爲太子春坊知閣門事

管嘉泰元年除寧遠軍節度使以詩名有梅

林椅字奇卿麗水人紹熙進士淹貫經術以周禮爲周

公經世之書凡民極所由立日用之常誠僞之變莫

不區別纖悉畢備椅乃隨類修列之名曰周禮綱目

調紹興府教授時翰林學士樓鑰禮部尚書倪思表

其所著進奏除刑工部架閣

葉禔字天祺麗水人問學該博文詞典贍任上饒縣簿

時馬光祖守建康兼江東安撫使辟至幕府多所贊

畫梁椅華登雲朱天民吳楊皆出其門

梁椅字子奇麗水人嘉熙進士時甫弱冠蚤脫場屋遂

得潛心講貫力于爲文尤精四六晚歲慕程朱之學

編輯遺論名曰論語翼除太常寺丞權禮部郎官

俞來字舜咨麗水人太學詞賦有聲官至國子錄

葉夢雲字天游麗水人博學多識以文學鳴嘗哀輯諸

儒論史精語爲一篇名曰通鑑發揮中景定三年進

士爲吉安教授

陳汝錫字師予青田人幼穎悟善屬文或以其詩示黃

庭堅有閑愁莫浪遣留爲痛飲資黃擊節稱賞曰我

輿州志 卷之三  
輩人也登紹興四年進士邑之登第者自汝錫始提  
舉福建學事官至浙東安撫使贈中奉大夫有鶴溪  
集十二卷子禘以父蔭任潭州通判著蒙隱集  
蔣存誠字遂明青田人好學工文詞登崇寧五年進士  
歷官國子祭酒知饒州建炎間封開國子食邑二百  
戶著國子先生集

林越字伯仁青田人父通本龍泉人流寓青田登宣和  
六年進士生越登紹興二十一年進士監行在諸司  
審計司生平學力深于漢史撮其文附以訓詁五十  
篇名曰漢雋其他遺文甚多一夕感夢上帝有仙官

之名無疾而卒葬雪峰山第永弼亦登第

季大老字元老青田人紹興進士任婺州錄事叅軍孫  
申伯博學有高致名流多所賞仰有訓蒙詩行于世  
申臯數歲通九經兼試春秋中神童科

劉溥字德廣青田人紹興甲戌別院省試第一人中甲  
科工詞章有志操累遷大宗正丞兼權都官郎姪陟  
文藻雅麗人所傳誦孫龔俱以年少世其科

余經國字朝綱青田人仕終撫州推官德望隆重鄉人  
從遊者衆稱爲鄉先生

鄭克己字仁叔青田人登淳熙進士性清逸有晉宋人

風範詩自成一家嘗有句云自是隆興新體制元非  
大曆舊詞章官至福建提刑司翰官

朱筠字仲端青田人甫冠以詞賦魁鄉薦繼游上庠中  
特奏名第二人湯岐公一見奇之命子碩受業內翰  
李燾時亦從遊除蘄春監尋卒有竹軒小集

蕭暉字君實青田人幼穎異六歲能屬文未冠禮經舉  
入太學有聲試春官占首選登紹熙元年進士分教  
臨江以大學絜矩中庸伐柯章揭示學者知用力之  
地尋除文思院

項文字丹坡青田人咸淳戊辰舉鄉薦春闈不利主司  
嘉其文學博瞻留試館職至景炎初掌本縣儒學教  
事

胡份縉雲人文章氣節爲學者宗官至國子司業後守  
鄱陽有詩集行于江西汪藻爲序

胡權字經仲縉雲人紹興十八年進士調崇安尉歙縣  
丞官太常簿權通經有學識教授鄉里遊其門者多  
至顯仕

羊永德縉雲人師呂成公祖謙著春秋發微由進士終  
奉議鄆徽州通判子哲師呂成公子伯愚學問該博  
才思深遠所著有指南集

楊光祖縉雲人崇寧中知歙州黟縣善文詞

李桂字芳叔縉雲人調饒杭二州教授爲文自出機軸  
從學數百人多成名士識度偉卓議論慷慨作詩有  
晚唐風致

張少微縉雲人與弟少循俱以文學著相繼貢上庠馳  
譽京師後皆不出

楊勳字舜仁縉雲人博學究文嘉定中兩請漕舉終海  
州教授

劉澹然字安道松陽人博極羣書嘉泰壬戌進士歷官  
至秘書省著作郎初安道爲舉子遊三衢試士以風

雲龍虎之賦魁于衆作郡守史相奇其才而館穀之  
邑人項安世徙江陵其子容孫以浙東憲使行縣展  
墓安道以啓致之曰立春繡于霄漢之上孰不慕公  
子之威名耀畫錦于井落之間我但羨長卿之風度  
又曰千萬世之人物山川盡收入吏部精神之表入  
十歲之鄉隣父老尚能誦平翁卅角之詩其俊逸如  
此著有干溪集

華岳字元鎮遂昌人由特奏名官至台州刑曹元祐間  
令張根興學校延岳爲師教導諸生趙顥鄭遼皆其  
高弟

龔敦頤遂昌人原之孫博通羣書撰元祐建中列傳譜述一百卷淳熙間修國史洪邁請加甄錄授潁州文學仕至宗正丞

鄭球字端夫遂昌人少以學問稱居鄉教授從者如雲紹興間登第分教盱眙縣改茶陵簿秩滿引年賜五品服歸張貴謨華延年皆其門人

葉濤字致遠龍泉人熙寧進士以文章見褒于神宗任至翰苑以微猷閣待制致仕徙居白下與王蘇相友善倡和甚富

管師常龍泉人與兄師復俱從胡安定學有盛名熙寧

元年上祀南郊大沛詔舉逸民部刺史以師常應詔

越三年名試舍人院賜進士第授較書郎知江陵府

監利縣事時方以苗役新書從政州縣上下以趨辦

畢給赴功救過爲職業師常獨置得失與察訪使抗

論可否人爲師常殆之然恪意在是人亦輒亮意使

善立道出安州之應城少息僧廬忽一朝瞑眩問其

子希旦曰早晚日午矣起攝衣冠需紙筆曰吾年四

十九四大不可守寄語同道人日輪射牛斗徐置筆

就枕遂逝初居白雲巖自號白雲翁有集行于世

葉膺字遷善龍泉人幼知力學算法尤精登熙寧進士

大觀初詔天下明算士應試除算學博士轉鴻臚丞  
鮑慎繇字欽止龍泉人少侍父光祿官湖外時何琬在  
長沙宴文士慎繇賦書航詩立就且警張舜民輩皆  
驚曰此郎他日必以文藝顯後登元祐進士名對上  
曰見卿何晚耶除工部員外郎歷司勳考功內外所  
至有聲坐黨禁流落註杜詩又著夷白堂集神宗常  
御札飛白書夷白堂三大字賜之

鮑彪字文虎龍泉人精史學以戰國策書失次爲之註  
定時有論說以正其謬又有書解杜詩註爲司封員  
外請老賦詩曰此身甘作老林泉繇紳高之

陳垓字漫翁龍泉人開禧進士從水心先生遊爲文高  
古仕知泰州兼淮東提學

王淮字玉淵麗水人博學美容儀嘗受業于石塘胡先  
生大德間授瀏陽州教授歷松江路判官

郭良知號稼圃縉雲人博學通經文章道德爲時儒宗  
范霖字君澤縉雲人學問該博詞藻清雅嘗被召入獻  
元卦圖歷代編年圖授翰林編修出爲江浙儒學提  
舉官至禮部侍郎

樊萬字萬里縉雲人嘗執經金華王栢之門元初爲滁  
州教授入爲應奉翰林文字終江浙儒學提舉

施子正字伯高縉雲人沉重典雅言行可法至元中任  
開化書院山長遷金華縣儒學教諭

何人傑縉雲人鈞臺書院山長子永祖字叔通力學不  
倦薦初菴書院山長

羅忠字貞卿縉雲人博學能文任鄱陽簿

朱填字定甫縉雲人從金華聞人柳道傳金隆鄭復初  
青田葉見山遊爲本縣儒學訓導

周仲瑜松陽人父北山先生館職不受仲瑜承家學益  
肆力乃以辟授稼軒書院山長改紫陽書院

練進字長卿松陽人少博學通春秋尤精于律至正初

詔入翰林終登仕郎大司農豐潤署丞

鄭元祐字明德遂昌人天姿穎悟十五能詩賦與平章  
廉公爲忘年友父卒徙居姑蘇從學者衆省臺宣闕

憲府交薦至正十七年授平江路儒學教授陞浙江  
提舉所著有遂昌山人雜錄并山居文集祀于學

楊載字仲弘龍泉人精于詩學時與虞伯生揭傒斯范  
得機等齊名而楊尤稱獨步晚徙居浦城

項壘字彥高龍泉人博學能文尤長于詩石抹宜孫劉  
伯溫葉世傑輩皆相推重前後續集詩凡八卷題曰

山中言志



陳繹曾麗水人爲人口喫而精敏異常諸經註疏多能  
記誦文詞汪洋浩博其氣曄如論者謂與莆田陳旋  
相伯仲官至國子助教

吳仲元麗水人文學能世其家後爲本路儒學教授

王元泰字長卿麗水人明易經訓導郡庠子仲成獨峯  
書院山長姪景行通春秋經訓導郡庠

劉演字浩卿麗水人有文學美容儀受經于錄事玉山  
鄭明善最得其傳至正初起爲義烏教諭後署明善  
書院山長子彬洪武初工部員外郎

林森字君度麗水人博學老成爲後進模範不樂仕進

年九十餘卒

葉登龍字梅林麗水人博學明經講道授徒著周易記  
梁載字遜耕麗水人通經博學著元處州路志姪琪完  
埭以文學世其家

陳康子字景卻麗水人著通鑑節要刊于郡庠

葉燧號高溪麗水人善詩章有和陶集

葉復字仲明麗水人通經學著石山樵唱詩集

陳鎰字伯銖麗水人典教松陽善詩章著午溪集

任維平麗水人博究羣書至正己亥明師下金華同弟  
維信往見太祖方御食命賦青瓷壺維平卽對日貯

酒盛漿小類瓶曾迎湯武救民兵若教假入神仙手  
捧出中天日月明太祖大悅留語達旦俱授義兵萬  
戶維平辭不就後以所言皆驗再名封觀察使

劉宗保麗水人博學能文篤守儒行元任青田縣石門  
書院山長洪武初任本府儒學訓導

趙可久麗水人修身博學履道能文洪武初由進士舉  
任廣東左布政使

潘初麗水人以明經授本府慶元縣儒學訓導號金軒  
有雉足稟

潘伯濟麗水人有學行美丰儀國初以明經秀才歷監  
察御史陞河南按察僉事有巢雲集三十卷

黃池字伯生麗水人文章器識允爲時重官泰府紀善  
多著述有石樓文集師事劉伯溫先生

祝金字廷心麗水人性資淳厚志學不倦師事宋景濂  
由儒士任本府訓陞浦江諭屢典鄉試文衡所著有  
吟癡集祀本縣名宦

潘華麗水人由舉人永樂四年預修大典七年中乙榜  
授直隸臨淮學諭十年奉勅入禮經館纂修書成歷

任長汀南昌鎮江上饒諸學

吳允傳麗水人永樂六年以修書被名預修永樂大典

授順天府涿縣主簿致政歸自號枯山遺老有滌陰吟稿

俞廣字得濟遂昌人幼孤長克勵于學涉獵既博從先生長者習詩律永樂六年詔翰林集四方儒學士纂修永樂大典廣以能書薦書成被賜資詔就翰林益進其業十八年擢兵科給事中勤慎詳敏克舉其職坐累出爲邯鄲縣丞縣當孔道廣爲之有方民不困而事集尤以寬厚得民心洪熙元年轉刑部照磨宣德初陞刑部廣西清吏主事獄中無冤滯大學士楊士奇爲誌銘

吳紹生遂昌人永樂乙未進士以習譯文考選翰林庶吉士轉行在行人司使琉球陞禮部儀制司員外郎歷工部屯田司郎中所著有默齋集子亦進士官知府

金文字尚德麗水人愷之子聰敏過人弱冠登第由景泰辛未進士選庶吉士詞藻翰墨雅重文苑出守開封剖斷獄訟不避權勢奉勅審理南畿刑獄受誣得雪者以沉香木刻像祀之又上便民十事詔頒布天下永爲定式平生著作甚富有好生錄履素聞吟讖獄餘興和唐絕東遊等稿

葉桂字季鼎麗水人豈弟忠實輕財好禮年逾弱冠始習舉業博洽經史門壁皆書格言後以貢任淮安經歷陞知豐縣制服妖賊生平考著甚富尤工詩畫別墅在椒山沿流倚山逶迤如桃源人謂不減輞川云年八十七所著有遵制錄椒山文集

何燾字思仁麗水人少聰睿端凝加以父格教導之嚴自志學卽毅然以聖賢事業自期待雖習舉子業洞究性命不爲捷徑計督學萬公選入萬松書院以鄉薦授新喻教諭教人務底實用聘主湖廣鄉試號稱得人令信豐以寬仁爲理民常見思居家孝友出諸

天性府縣新歲一謁外未嘗干以私所著有四書集義春秋主意效顰紀舒嘯東臯篇滄螺錄青桂軒集蔣謚字則言青田人自少岐嶷穎敏以孝謹聞博瞻能詩著慰思集

董充成青田人讀書通大義事親色養明初避地居鄉有忿爭者解之貧乏者周之從子仕顯登科

王潤孫青田人德性溫重顛然士望文章詩律風韻蕭然明初知縣耿亮薦任本學教諭作典學賦通五經尤長于易有圖解集

厲光字仲潛青田人潛心古道經史百家靡不淹貫洪

武初宋濂薦任本縣教諭訓諸生實學不徒文藝相  
高著潛居集

留季安青田人由明經初任新寧伯較書選入文淵閣  
纂修四書五經性理大全書成授鎮江府學訓導  
蔣陬青田人博涉羣書以孝友稱著仁溪樵唱四卷  
包瑜字希賢青田人由舉人任教諭致政歸淮王幣聘  
修書進講便殿賜坐所著通鑑事類一百二十一卷  
左傳字類四十卷王閱之甚喜遂梓行仍命工肖瑜  
像親爲讚曰見道之真履道之正咳唾古今寤寐賢  
聖傳獵經蒐回瓢點詠衣冠肅如後學企敬居七年

告老歸選述甚多見藝文志

葉愚字弘明青田人稟性剛介學有淵源工詩文喜談  
世務歲貢春官作諫章六事一曰去壬人二曰除佛  
法三曰興土木四曰好神仙五曰早朝六曰邊務將  
上于朝執政者以爲出位賈禍寢不奏授武定訓導  
以文學節義勵諸生一時興起著如存集詳陳中州  
墓志

梅熙字景和縉雲人通經有學行嘗與其師朱公遷別  
二十餘年千里聞計熙至番陽爲服心喪時人義之  
歷麗水青田遂昌縉雲訓導洪武十三年舉博學明

經撫安永平軍民

王濤縉雲人博學端行家藏萬卷號墨莊著有愚泉集  
不仕

葉叙字公倫縉雲人號九盤山人性資端謹童少時樞  
侍永嘉夏清伯麗水葉文範得壁經之旨所著有用  
拙稿

鄭禧縉雲人至孝博學父鏗致政家居爲結社以怡其  
志累官信陽知州有惠政祀名宦所著有周易本義  
音釋齊東野語輯畧范文正公年表東湖集吟鞭小  
稿

景辰字以行松陽人永樂中學士王景彰薦入文淵  
閣纂修國史試以鴛鴦菊立就曰漢宮瓦冷夜來霜  
佳菊凌寒獨弄芳擢知閩連城松溪二縣吏民愛之  
練魯得景辰上元應制詩誦曰此詩壓倒文淵閣矣  
家有東蒙集

包文舉字仕登松陽人從王西山先生受尚書得聞性  
命道德之學應賢人君子聘爲國子助教一日明祖  
召入武英殿賜坐陳二帝三王之道稱旨顧謂近臣  
曰此吉人士也以詩訪問數有匡正陞齊府長史潭  
王以其聞望雅重之高麗國亦聞其名所著有兩菴

和陶壁水海岱等集

季仁壽字山甫龍泉人元末用薦者起教諭慈溪徵通租新禮殿祠黃公震于學宮遷松陽教諭郡守請定鄉飲酒禮斟酌古今定爲儀注陞雙溪山長轉婺州教授不赴放意物外治易詩書春秋學者稱爲四經先生著有春谷讀書記易詩書春秋四書衍義四書質義策樞通覽詩林鉤玄弓冶錄遭兵燹鮮存春谷集行于世

鮑渾字廸中龍泉人洪武中由監生授兩淮鹽運使清節自甘喜天文術數之學尤深于易理解任歸優游

山水不知所終

張克靜龍泉人自少簡重寡言留心經史弱冠中第任

江西奉新學教諭

陳圭字思復龍泉人自少穎悟好學孜孜惕勵不憚寒暑每夜讀必繫髮于梁効古人圓木警枕之意後由進士任工部主事

葉瑗字仲美慶元人少穎悟力學十三歲卽蜚聲邑庠及長試棘闈以制額限遂賦歸不起口與其徒談道自樂年七十以壽終

徐用中麗水人幼嗜學長于吟諷以學行稱由秀才授

遼府教授訓課生徒多有成立

吳廷桓麗水人洪武中舉明經任王府紀善有百韻梅花詩詠史詩槐溪吟稿著于時

戴夢齡青田人岐嶷穎悟七歲如成人爲文操筆立就一日先輩謂之曰項羽聞楚歌賦作者多不工童子能之乎夢齡唯唯移時草就坐客驚駭曰此奇才也有司將聞于朝其父固辭乃止未冠而卒人名其所居之山爲神童峰

陳孟素景寧人性姿清逸雅嗜吟咏僉憲鄭建公高其行嘗贈以詩曰嗟予浪作爲臺客觀風曾過楊雄宅

自號訥翁有詩集藏于家

潘辰景寧人由薦舉官太常少卿學術純正妙契性理博極羣書爲文追配秦漢直內閣二十七年誥勅多出其手士大夫翕然稱美嚴于自守動遵聖賢繩墨不以非義自污卒以賢勞特賜葬祭內閣楊右齋誌其墓謂與吳康齋異跡同道著有南屏遺稿父潘流清博學工文未析景寧縣時中正統辛酉青田學舉人時會上車駕幸太學賦深爲大司成李時勉所重潘援景寧人由舉人貌古行方優于詩文侍御西蜀李公稱其文已刊化處憲副沈暕嘗曰先生詩文宜于



兩漢間求之兩聘文衡公明服人陞翰林簡討授中書舍人有持身清慎泣事精詳之褒家居二十年鄉髦皆賴有造所著有東厓摘稿詩林辯體

王養端字汝推遂昌人倜儻負意氣抵掌談古今壘壘如懸河工古文作聲詩如出唐人口昭舉順天亞魁大學士袁煒每推轂下之與濮州李先芳楊州宗臣諸名公相結甚驩平生著述甚富<sub>有</sub>震堂集山居論黃九章字叔範中之子遂昌人性資疎朗學問宏深由貢授龍溪訓華亭諭海州學正南昌教授所至于士有恩每署縣輒著聲績尤長于詩文所著有秋水齋

集

葉澳字爾瞻遂昌人齠髫時卽負大志知縣黃道瞻一見異之負笈從明師游受知于縣令湯顯祖萬曆甲午領鄉薦因抱疴不獲顯爲世用所著有四書註翼易通淇筠志感并詩行于世

黃九鼎字禹鈞遂昌人中之姪萬曆癸酉舉于鄉除陝州守多惠政未幾解職歸愛西湖之勝遂家焉名山異蹟題咏幾遍尤善于樂府擬古諸體結社湖山與名公互相唱和督撫劉公一焜尊爲人倫楷模捐俸梓湖山百咏七十二草行于世

徐應乾字以清遂昌人行誼端謹學問淵宏家貧課生徒東贄奉父均予諸昆不入私室夙著才名由恩貢授寧波訓清遠諭雷州府授董修府志著有昌巖藏稿士林正鵠行于世

包志伊字惟任遂昌人孝弟廉讓聰明正直睦族恤隣有古麥舟風髻年游泮侗儻負大志自舉子業以外經史諸子一目成誦爲詩歌古文辭娓娓數千言爲邑侯湯公顯祖所器重讀書唐山無疾而卒尋葬于山有樵童忽見禰嘆者降語曰上帝以吾齋志而沒勅吾爲英靈公主此山于是邑人零雨被子者禱祠

輒著靈異肖像寺中

潘覺民字任卿遂昌人幼孤事母甚孝早歲失偶一子賴母育之終身不再娶待兄弟甚友愛幼弟已教誨之家貧苦耕弟子以百十數不以少長分勤忽不以寒暑輟講誦皓首齋志邑稱人師經師云

鄭秉鍊遂昌人以歲薦授蕪湖丞處膏不潤日與諸生爲文社以清操見忌免歸囊橐蕭然讀書彈琴修家族雍睦之政一鄉化之一時名公如焦漪園楊崑阜皆雅重之

鄭子壽字邦德縉雲人文茂長子聯捷名魁愛庶弟分

甘讓羸葺墓廬增祭業董建凌霄塔邑人永賴令合  
肥革火耗禁雜派斥庭實修建龍門等坊興釐軫恤  
五閩月化洽四履厥躬瘁矣肥民如喪考妣建哀思  
祠入郡邑名宦著有易經四書心傳會說漱芳堂稿  
鄭日強字邦寅縉雲人生有淑德仁孝溫恭父母得之  
晚依依膝下父誘之學繙閱卽能記誦喜讀漢書尤  
工書法弱冠試輒高等丁母艱哀毀骨立水漿不入  
口者數日父慰之乃稍沾饘粥苦塊三年萬曆癸巳  
以選貢入北雍爲大司成所重以父稀年告改南便  
省養父喪飲泣如母服闋謁選不屑俛仰時局授崇

仁丞性甘恬淡書素位二字于署誓飲崇一勺水也  
奉上讞則矜情衷理兩造稱平口占二絕示寅列士  
民有一塵不染靜止生明之句見哦松草歲旱編素  
步禱赫曦中雨卽霑足督撫衛公重其清望委盤倉  
及報例有吏司罪衛公曰鄭丞查驗無虛免之權稅  
章家石秋毫無染郡伯欲久借力辭攝東鄉樂安二  
篆幾報政臺使列之薦剡以瘁卒于官圖書數卷無  
以爲殮粥諸媳衣賻治之民皆巷哭治行循卓至今  
稱之著有易經家說四書鏡哦松草  
葉曾字一之麗水人秀異聰穎髫髻有聲性孝友父病

祈神自代喪母啓穴有紫茜人以爲瑞文價籍甚一時負笈遊吳下名公多器之郡司理吳江顧公太守宛陵任公俱筵賓館爲子弟師兩與乙榜僅以歲薦首廷試司訓宣城薦擢順義令再擢莒州守致政歸結社園亭邀朋觴咏懽然自適著有梅下餘言八卷年七十六祀鄉賢

葉志淑字子善麗水人家貧力學灌汲自資不妄交游蓬徑不剪泊如也精三禮累試皆優貢入成均萬曆壬午中順天鄉試署靜海諭陞虹縣令歲餘以骯髒忤當道致政歸逍遙林下怡情吟咏郡守宣城許公

聘修續志

胡廷賓字用予幼負大志父功懋衛揮使以遠大期之克勵向學年十六補諸生負笈西湖遊具區馮太史門爲諸名公所鑒賞郡守漳南鄭公邑令進賢樊公深器之丙午以尚書魁浙闈屢蹶春官志益銳事母張極孝敬不蓄私財兩娶妻頗饒奩貲盡供晨昏菽水之懽讓勲秩于弟廷相亦中武科爲游揚當道致歷都閩叔季入泮多所訓迪歲時與婦率諸弟姪妯娌繞膝舞綵色養痛父不逮以陟岵名軒登乙榜竟賈志以歿人共惜之

何應乾字孟陽麗水人觀察公鏗之長子天性穎悟雅尚質素與弟應春應文以文行相勗侍父端肅溫順尤得懽心弱冠入庠試輒冠軍以貢授寧海訓以古道與諸生相啓迪寄情赤霞台宕之勝卽景賦詩薦擢荔浦令下車卹民好士性厭吏事未朞月飄然解綬歸就悠然堂與朋輩觴咏自娛一切世事悉置不問惟嗜書至老不倦簡編藏貯頗多人有別集必借錄之尤獎進後輩與人交直諒多聞屢重賓筵年七十八考終不亂應春字仲仁魁梧倜儻博洽風雅兄弟自相師友工臨池詩以陶韋爲法世業岐黃以餘力究心方脈每親友有疾得一匕卽瘥屢困塲屋不挫與人坦夷以道義文藝相規人共薰其良普應文字季明醇篤向學恭謹謙下待人無城府以文行爲陸鍾符祝石林諸公所重觀察公清操宦貲不腆食茹苦恬如人以爲無忝清白家風云

吳文榮字汝仁麗水人沉潛嗜學恬淡寡與至行醇篤人無間言弱冠餼庠文聲籍甚當道多賓禮之以歲貢中北闈乙榜任撫州訓又中江西乙榜業登薦剡未竟其用而卒

李邦棟字爾拙縉雲人穎異不羣下筆千言立就性磊

落高自期許與弟邦樑邦柱白相師友謂青紫可拾芥也未弱冠入郡庠試輒首諸生以好奇致困場屋丁酉選入成均議論超卓爲大司成所器重竟以數奇未售賚志而歿

吳應期字世昌麗水人得先達南山鄭公尚書之傳篤志潛修與弟應斗白相師友晝無虛晷載籍極博剔秘搜菁無不暢曉如洪鍾待扣門下士成就者多操履純固行已端方不苟合當世而亦與物無競以貢授淳安訓遷容縣論未任抵家卒

鄭秉券字錫卿遂昌人髫年入郡庠太守張公器之因贊于麗端方勤學以毛詩教授門徒一時監司守俸多延賓館爲子弟師以貢訓開化轉分水論俱得士心卒于任

陳萬言麗水人少英敏髫年入泮試輒高等博綜經史尤長詩賦郡邑士大夫多敬重之以歲薦未官而卒爲時所惜

季大侃字震玄龍泉人年十七游泮持已端方與人和易以歲薦入成均爲大司成所鑒取嬰疾而没人咸悼之

季敬臣字景竹龍泉人髫年入泮聰穎博雅試累高等

長詩歌工繪畫琴書一室吟咏自如以貢任定邊令  
遐荒布德行李蕭然著有纈璘館招劍篇此君愛助  
集藏于家

周立身字名卿龍泉人幼穎異入泮讀書無間寒暑天  
啓初選入北雍兩舉不售考縣職未任而終

程鵬字叔南松陽人勤學敦孝童年列膠序足蹟不躡  
公庭聚徒講肄遊其門者皆甘恬退膺賓筵益勵清  
操

徐學禮字仲立松陽人事繼母盡孝友愛兄弟讓產卻  
金性奇敏爲文每于傳註外出特解何賓巖先生高

是也一時學使郡邑大夫稱之丁酉選貢以研究積  
勞卒于京邸同年趙無聲理其喪惜未展所蘊云

陳偕字世和青田人天性孝友執親之喪一遵古制博  
洽詩文義方訓子謙和接人自天台司訓歷教諭學  
正教授十有五年囊橐蕭然在建昌益王重其文學  
加禮焉著道教源流古今政本天台紀勝等書祀瀘

溪名宦

林應璧字尙輝青田人八歲善記誦大母傷左足依依  
扶持不離昕夕入庠精舉子業典雅不羣每朔望整  
衣冠拜家祠鄉閭以爲表式以歲薦入京廷試歸抵

揚州遘疾卒人有夢其為神者  
 張本洛青田人幼承父訓闢館于劔石山鶴洞師事丰  
 野范先生于義利關頭甚晰弱冠入泮竭力養母敬  
 兄輕財篤故身無完衣家無餘粒處之泰然朝夕課  
 兒口不絕吟數薦賓筵年七十三卒  
 劉世學字少白青田人文成公十一世孫性聰敏力學  
 敦行善吟咏精翰墨自芝徙毗陵母沒廬墓茹素終  
 身為白下諸名公所重寓京邸三十餘年聲色貨利  
 毫無所染講學論道縉紳多折節下之  
 鮑彪字文虎縉雲人由進士授司封員外郎註戰國策

序次正誤時出已見劉辰翁盛稱之又有書解杜詩

註

田君有字良臣縉雲人幼習舉子業嘗一舉不合時文  
 尺度遂隱居著書有太極通書說二卷春秋管見三  
 卷性理七篇河圖洛書大衍揲著太元準易說參同  
 契辯律呂天文地理精考諸史類考二十三卷

李灝字資賢縉雲人修軀偉度博學通才補弟子員  
 遊胡僉事門與開化吳景端齊名屢試異等不第而  
 貢因遘疾歸惟琴詩自適生平孝友信義淹博經史  
 百家喜古樸厭浮華尤多拯難賑貧修葺橋樑不伐



功不信因果流俗師之著有憫志稿行世今仙都雪崖是其手闢遺踪云自歐主平本文訛謬甚多  
李應春字次白麗水人郡廩生少穎悟淹博羣書受業問奇者甚衆制行淳樸有古風善屬古文詩詞爲當道所敬朱郡侯請修郡誌以將貢年没人悼之

王用臣字羅南青田人蘊籍弘深工詩賦經史及星緯經野鐘律象數諸家罔不鈎索居家孝事繼母以明經訓浦江有月泉晦菴東萊講學處集士結社葺文昌祠陞象山諭捐俸賑飢全活甚衆轉南安郡博歸作寶穀詩勸農戒著有懺庵一集二集三集明志錄

行世

季胤緒字紉絃縉雲人豪爽自負博洽羣書爲文類漢魏所著詩集多長慶體  
葉守暢字毓寰青田人自祖父師范半野之學半野爲陽明先生高弟洞徹奧旨以明經司訓仙居台李蔣童公鳴玉敬重之咨治論文撰潛心理學卷爲贈歸里陶淑後賢戶屢常滿

葉永華字玉果松陽人登北榜賢書對智勇策幾萬言時與揭重熙王宗熙稱海內三奇司成倪鴻寶拔異等延入西席每與論經國大事著藕孔集讀書日記

續河圖衍義諸書未行世卒

周三錫字士承青田人生而克類受業劉公康祉之門  
文名藉甚登萬曆乙卯鄉薦精于易每一藝出後進  
傳誦困南宮授知縣卒

童進思字懋忠遂昌人弱冠遊庠九入試闈偃蹇不第  
志益壯一時名士皆出其門課子一經善吟咏有溪  
上吟董子離騷  
王文中字紹全遂昌人性秉孝友禊躬端樸讀易精陰  
陽妙解游其門者歲常滿少食餼試輒冠軍閉戶好  
學不履公庭戊午歲貢恬退自甘年八十五卒

徐應泮字鵬池遂昌人弱冠游庠性孝晨昏定省親亡  
行文公家禮閭居欽其孝義文宗樊公重之生平著  
作多古人名篇

詹加新字象鼎松陽人幼稱神童舞勺食餼博極經史  
諸書胸襟磊落不循世法至排紛難散千金弗惜因  
赴貢卒里人痛之

麻一琴字和齋麗水人穎悟博學在庠試輒冠軍著有  
四書正說易經解訓行世課子文憲明經出仕

宋明誠字聚敬遂昌人性孝友工詩文操行耿介巖然  
嶽峙鄉黨有不率者咸服其化樂道安貧有陳太邱

風郡縣景範如山斗卒年九十

葉繼康字伯阜遂昌人事親先意承志撫幼弟提獎友愛與人無競御下有恩讀書一目數行自經史子集稗官小說靡不淹貫髫年遊庠卽膺餼廩數舉于鄉萬曆癸卯中浙闈副榜以貢授鄞縣訓待士作人爲縉紳敬重陞昌化諭逾年致仕歸屢應大賓席無疾壽七十五終

童問禮字用和遂昌人舞勺遊黌屢赴棘闈終始念典臯比尊肅出其門者多名士訓嚴義方子任良任重任大胥列廩增德文兼優堪爲楷式

王孕彙字輝陽青田人任江山訓性溫良通達和易近人瞻博能文家貧堆積羣書邑里奉爲型典聘修郡志

葉芳萼字伯開松陽人少好學處家庭以孝友聞早歲食餼持已醇謹淹貫書史遊其門者甚衆屢舉德行著西崑集

葉正字書升松陽人淡泊自甘好學砥行一介不取士林中之恬淡者

辜存表字元表麗水人博極羣書試輒冠軍數困場屋教授生徒四方名士多出其門經史皆手自評註尤

長于詩所著有甌廬草蓮甌子等集

張漢傑字希房處州衛人自幼穎異遵寡母訓讀書白雲山寺嘗袖攜蔬米欣然入山生平不道人短登明丁卯鄉書四上公車以弗獲一第悅親心爲憾家無贏餘好聚書欲子孫知其購此何爲也精易理子嵩生歲薦

錢湛字公露麗水人秉性溫良天姿英敏束躬端謹無疾言遽色讀書攻苦晦明弗輟于六經諸子無所不通康熙癸酉舉于鄉任蘭谿教諭造士論文庠生多所造就

辜景臯字愷六麗水人才識通達聞見博洽生平著作甚富劉在園太守極賞其跋賣柑者言一篇後以明經終

陳大受字子宏麗水人拔貢生爲人倜儻豪邁博極羣書詩賦文詞一時立就與修郡乘編校獨多晚年以生平著述不能梓以問世將易簣命子束置問天樓以俟後之知己

楊金生字協恭麗水人篤學好古詩文醇正典雅教授生徒先行後文多所成就康熙乙酉秋闈卷爲圭司所賞以限于額不獲售以明經老人共惜之

葉應鸞字漢翎麗水人賦性恬靜文行端雅以貢授仁  
和訓未仕而卒

受篤行

士苟篤志勵行必不為時俗轉移如舊志所載  
林泉若而人雖名不登天府而矯矯自好行誼篤實  
以之砥世而振俗殆庶幾乎

季棠字仲庇麗水人宣和中貢太學履行端重為後學  
矜式官至殿中侍御史年九十餘終

毛允理青田人紹興間水溢民居蕩然死者無數獨覓  
巨舟救溺得活者多水落沙積如山允理屋宇几席  
器皿如故事聞封奉議大夫表其坊曰進德

毛當時字行道青田人性倜儻篤行義由紹熙進士倅

韶州積俸金八百盡散之親舊後守雷州歸復捐田

益義廩鄉人立祠祀之大夫其女曰

詹駉字存孝縉雲人大中祥符元年舉進士第一真宗

書榮桂二字賜之年二十二官至大中大夫翰林學

士致仕性嚴重子適中第歸省踰期拜庭下久不顧

命去袍笏杖之白母以一第縱忽也二子俱以孝聞

施勣字彥功縉雲人為大理評事致仕晚年廬墓甚得

林泉之趣

施鵬南字萬里縉雲人弟鵬升字仲舉鵬飛字仲遠俱

受登仕郎誥遭世變革不仕兄弟聚居無間言家庭

禮讓之風為鄉邦稱重

陳洵卿字仁甫縉雲人授浙東行營招撫使為人莊重

才識超羣少以學聞仲兄洪卿幼出繼永康樓氏洵

卿哀請于父令歸宗極意友恭鄉黨義之

潘宗回字幾仲松陽人登進士由秘書郎出宰延津通

判杭卽洪三郡知福州兄弟聚居三十年敦睦無間

鄉人稱之

陳鑄字叔鼎麗水人幼喪父力學通經至正間以德

聞授金華照磨未期謝歸時二兄早喪奉嫂盡禮撫

姪如子田產取其瘠器用取其敝鄉人喪葬力不足

者出財賑之洪武初劉伯溫胡仲淵欲薦用之因哭親喪明不果

楊顯文麗水人由儒士任本縣學訓爲人輕財樂施陞武康學教諭

吳宗文麗水人通春秋隱居西山鄉人高其行誼以野齋處士稱之

陳炅字仲圖麗水人父必良歿水知縣母寡育炅甫一紀充郡庠弟子員永樂庚子舉于鄉篤于養母無仕進意郡守張公佑周公祺皆禮爲大賓年九十四終吳泰處州衛人千戶父早逝母王氏抱節育泰年十一

襲父職尚文藝讀書好古雖武弁禮度雍容人咸重之正統間山寇竊發效職守城未四十乞休進階一級別號懶雲

葉玉字振之麗水人八歲充增廣生後以貢官潯州教授好施與有大節孝事二親垂老不懈與弟同居友愛極篤始仕福州捐俸助貧生朱德貞等勒學宮題名碑歷官二十四載清苦如平時當道推重鄉里景德焉

高鑑字益之麗水人潛心力學不樂仕進重義輕財尊德樂善天性純朴鄉里有爭訟得其一言卽服人有

骨肉難處之事郡守必檄行處之各卽省悟庶幾以德服人者倡隨偕老相敬如賓途行遇童稚亦必揖讓成禮誠篤行君子也

項泓字德容麗水人由歲貢任德興縣訓年二十七始發憤讀書志堅質魯跪凳警省每對月默誦史鑑以明經稱凡授業者俱底于成士林重之卒年八十七戴詮字文衡處州衛人正大端厚言行皆可師法孝友信義著于中外以歲貢授鹽城訓值歲歉當道命監賑至興化得羨銀九百餘兩令請中分峻拒之悉以分賑令復以四十兩爲贐蓋懼其泄聞當道也又擊

卻之淮揚賊嘯聚待御檄入賊巢諭撫卽直入曉以禍福賊遂解散轉益都教諭擢宿遷知縣未任卒祀名宦所著有會正錄十二卷

張欽字克讓麗水人性質直人有行不義言不善面斥不少恕友愛諸弟不計父產與汪瑛吳榮會講明徹經義以貢授九江訓擢湘潭諭皆以勤教清白自守士有貧乏者咸受其濟歸家安貧自得訓諸子成立後以子敦仁貴贈兵部主事季敦復繼登進士

金菴字崇吉麗水人力學篤行端敏謹厚十歲時母疾籲天告代母病革粒食不入口與兄祥弟祺相師友



以貢授雲南永昌府判官常利興壽縣承檄安撫干  
崖隴川酋長餽白金良馬卻不受謝事歸杜門歛跡  
賦詩自適卒年八十著有易意白湖詩文集

葉禎字瑞卿麗水人嘉靖戊子鄉薦初授江西宜黃縣  
剛介不阿忤當路改官巴東節用愛民上下信服尋  
遷廣西梧州通判不赴巴民立祠祀之著有石川稿  
韻府釋義家禮便覽

何琪字良璧處州衛人封刑部郎中溫毅閑靜事二親  
至孝喪葬循禮撫弟姪友愛同堂四十餘年雍睦無  
間姻戚缺生計者貸給之郡守董公拓學池捐地爲  
助家人欲乞綠波亭址抵捐地架樓其上時公就養  
京邸歸聞之曰此古蹟也安得專爲己有命毀之墟  
其地以還

何琮字良瑞處州衛人正直忠厚苦心積學作人不倦  
修舉郡中文會多所造就門人陳菀王一卿姪鏗先  
後登第皆其指授以貢任撫州訓導課生如在家士  
思德崇祀名宦著有策場集要若干卷

陳遂字宜民麗水人由選貢任曹州學正致仕天性孝  
友素行慈仁割股廬墓兩奔親喪徒步千里嘗易己  
產代姪輸逋負纂孝順言行錄心體力行絕跡公門

篤信好學是鄉先生沒而可祭于社者

留稀固青田人好讀書善言語洪武初應召入對甚切時宜上嘉之曰全實老人留稀固賜名稀古以人生七十古來稀也欲官之以老辭錫宴歸

王聰青田人由賓貢任定遠知縣老而好學手不釋卷處家事伯兄如父居官愛民禮士定遠立學自聰始葉素字尚文青田人由選貢在訓導事父母以色養友兄弟白首不二內外無間言與陳中州同學同志每自言曰氣節文章吾畏陳子至其闇然日修澹然無迹雖中州亦自謂不及也所著有四書節釋易經美

記宋元綱目斷隙觀集

趙曾字子益縉雲人授翰林庶吉士伴讀周府德行純備造履篤實善古文性耿介不從俗俯仰著有太古

集

季樞字子木縉雲人與弟棣楹皆有文行相友愛久不析爨庭無間言里黨稱之

李醇縉雲人棠長子性朴素不受父廕孝友篤至邑中疑事令每造訪人服其公正甘清苦以終身

周瑾縉雲人常德府訓導贈都察院右都御史守約安貧歷任六年經術行誼一時宗之致仕歸絕跡公門

所著有觀書類記怡菊應酬稿

樊通縉雲人年九十五郡侯贈聯云加五載真成百歲

只一身直配三才壽百三歲著默庵集

丁猷縉雲人事親委曲承順友愛諸昆尤喜閱古史與

耆英善詩文者日相賡唱訓諸子以矩度卒成令器

視勢利紛華若浮雲然鄉閭咸則之

范卿縉雲人寶慶府訓導居鄉讓己址以闢泮宮出仕

捐學俸以賑貧士德行高古祠名宦年八十餘終日

讀書不倦

丁愈縉雲人性醇謹家貧裕如也早喪父事母先意承

順母病醵天願以身代及卒罄產營葬泣血三年

貢授景州訓導以仲弟姪壯未授室季弟業儒未

不以公祿自享盡出爲娶室納儀之費自少至老無

妄言無遽色齋居必端坐郊行必恭敬識者咸稱爲

道義之士

鄭修縉雲人至孝甘恬退古心古行塵視紛華有佃人

匿稻于稿下者僕發之修令急覆母令若覺我知也

寬厚率類此邑侯周公李公欲見之不可及以鄉飲

請曰茲禮也吾見之

李光縉雲人性孝友寡言笑重然諾視勢利蔑如也暇

則經史自娛喜飲有節常慮失禮于人俗尚爭競光獨恬靜絕囂塵聞有競者力和解之其清修不凡類此

鄭文縉雲人事親竭力承志字孤姪猶已子每旦必焚香拜祖祠下至老不輟嘗修學宮新聖廟尤喜引人于善釋人之爭邑里咸推重之

詹源松陽人字朝宗任湖廣楚府教授啓王以二帝三王之道王肯其言及掌簿正司出入卻分例王益賢之謂世子曰詹先生學行近古剛方正直汝宜師之三年辭歸構屋一區與子姪業儒者居及定房籍請

書契則曰汝居卽汝屋何用書也足跡不入公門邑令就見欲爲治舍力辭焉

朱子堯字仲穆遂昌人讀書好古以義槩勵俗鄉人曲直咸質焉弟子理少有孝行長敦詩書正統間宣平寇入境慕其德義以劍書門曰積善之家戒不得犯其行誼感化如此

華鑑字時重遂昌人由歲貢任長洲學訓陞湖廣鄖西教諭以母老致仕不赴孝謹事親明于醫道鄉人稱之

朱自強字體乾遂昌人博學好古事親孝母故以試走

武林不得訣跌奔慟哭幾絕執喪如禮季叔早世竭力殯葬撫其子成立弟逋負獲罪罄產解之平生手不釋卷坐臥處皆置書好誘掖後進朝夕談經史析疑義至老不衰以貢授莆田訓導不二年謝病歸著易經破愚四卷

楊弘字崇仁龍泉人任南京光祿寺珍羞署署正未幾引疾歸才學行義爲鄉閭推重

張銓字秉衡龍泉人涉獵書史篤于行義事無大小不苟屢薦鄉飲不就知縣鍾繼瑜扁以海內耆英年八十終

吳文慶元人狷介有守爲上海丞以節儉稱致政歸族有不給者助之年七十以壽終

吳節慶元人純謹雅素足爲儀範授新建丞甫月餘致政人服其高

柳杲字寅賓麗水人謙重謹實學問頗優由人材任處州學訓後謝歸舉足不苟約束子姪尤嚴得俸金悉濟族中之不給者身範家模多所垂法

王庶悅麗水人性好善與弟庶康同居四十餘年內外無間言有地近學宮欲衰之偕王存濟王弘華應不受值人咸義之

王存誠麗水人性孝義善詩文以儒士徵初授上林苑  
典簿尋擢監丞時山寇爲亂有指良民爲盜者百餘  
適宦回于黃頭塢辨其非盜力白當事活之著如愚  
集

吳子聽麗水人居家篤行孝弟鄉人有不平者多往質  
宣德間歲歉捐租爲鄉民代輸

湯濬景寧人由歲貢任高明學諭德性溫厚有古人風  
度居官清守人無不愛敬之祀名宦

鄭浙字子東麗水人沉潛問學嘉靖壬子鄉薦歷知東  
平耀州以岷府長史致仕杜門謝客服御無華淡泊

寧靜可稱狷介子芬孝友端方淡于世味有父風以  
貢任清流訓轉寧海論致仕歸卒

易文字宗周麗水人衛左百戶應襲棄之就文爲府學  
廩生天性至孝督學屢旌優行因父以中風卒于浴  
盤終身不浴由貢仕至益府教授爲王世子所敬重  
贈以詩居家雅好恬靜得城市山林之趣數舉鄉飲  
以壽終

程錄字文式麗水人讀書知大義事親愉色婉容先意  
承志父沒遺婢賠奩具遣嫁之待庶弟如同胞田產  
什物悉均分置屋以新者讓之已居其舊處宗戚鄉

隣恩意周洽有司扁其門曰克敦孝友父應龍亦以耆德見推先後賓飲于鄉人以為世濟其美  
葉世瑞字汝賢麗水人言必忠信動履準繩聚順事親敦倫睦族待人一本于誠由歲貢授松江訓轉泰順論歸州學正多所造就諸生頌德不衰投老歸林泉自適鄉飲之外足跡不至公門真古道君子也  
吳贊慶元人朴儉端方孝友茂著宰連城貞介自矢居官甫一考即歸結廬龍山下二十年無私謁識者多之

吳伯齡慶元人精敏秀雅動必以禮早有聲庠序名流多器之母族夜失火有墜金髻者齡拾之詰朝持還其人以半稱謝竟不取通判汀州歸行已修潔為一邑表望

吳禪慶元人純恪寡言和而且介佐宿州二載即謝政歸養以孝聞宗族有貧者周之致仕三紀不干有司為鄉評所重

陳懋儉字舜嘉性至孝幼失怙母沒廬墓三年平居繩趨尺步儼有道氣象食廩府庠有同案幫補者先三日以無科舉不得貢推讓之後訓典化諭邠縣歷常州教授有貧生三喪不舉捐金助之懇乞致仕院飭

府備禮儀鼓樂旌其行歸值嫡兄身故親爲營葬州  
閭鄉黨稱其孝友云

耿鏞字良忠麗水人泗國公六世孫心純貌古行篤禮  
恭念先祠缺祭劉文成胡縉雲二祠例懇當道得入  
祀典諸姪有不能自給者捐財以資生計途行遇童  
稚必揖讓成禮有司錫冠帶屢延賓席壽八十六終  
劉大烈字思武麗水人安貧勵行事繼母孝養備至讓  
弟產友愛依依宗戚之間恩意周浹由貢訓合肥諭  
舒城教授南康待諸生如家人父子情意款洽濟急  
不責其償在任貽書子孫每以循天理勿妄求爲戒

晉周府紀善致仕三延賓飲以壽終子世用遵父訓  
敦厚醇謹事繼母溫清盡孝喪祭盡哀以貢未任卒  
李瑁字朝聰縉雲人歲貢封通政司叅議贈刑部尚書  
學博行敦父長以給諫建言謫終于閩扶櫬歸力辭  
當道賻金壽八十五祀鄉賢子四鍵鏌鏌鏌並年踰  
九十樹四皓坊所著有霏翠臺吟稿

李珊字朝光縉雲人敦孝友絕紛華淹貫詩書墳典外  
則椎魯朴誠中則青箱武庫遍遊山水必記其勝文  
辭援筆立就著醒脾鐵鏡月巖偶然錄詩韻音釋續  
癯老人傳皆裨世教非苟作者



丁錦字舜文縉雲人雅志靜修好仁樂施教子孫以清  
自義方累薦鄉飲縣令躬式其間鄉評重之  
李陽泰字廷進縉雲人嘉靖戊午鄉薦授魚臺知縣廉  
明勁直政善民安以母老致仕後以子貴封禮部儀  
制司主事

樊秀字汝賢縉雲人古心直道事親孝文章為海內共  
雅官尤溪建橋救荒記名宦  
鄭思齊字廷賢縉雲人倜儻負大志淹貫子史性孝友  
事父夙興夜寐事嫡母尤先意承志母忘其非已出  
生事葬祭無踰禮友族兄弟愛敬肫肫結社永寧天

壽諸刹皆公執牛耳十赴浙闈志益堅以明經選任  
廣平威學訓秩彝叙別采章有月川先生遺意歲  
飢道府委煮賑足遍窮村全活億姓聞母計就道廬  
墓三年遂不為首菑折腰所著有四書精蘊周易理  
解靜芳吟稿行世課諸孫傳註左史悉口授後多顯  
人三舉鄉飲年七十有九人望之翩翩陸地仙也  
丁繼雷字廷震縉雲人夙有雅志以學行著聞任袁州  
經歷老鍊勤勞賑飢捐俸施粥全活者數千人居家  
淡泊自守惟結社吟詩課子談經而已所著有續槐  
集

丁天佑縉雲人性靜行淳克敦孝友立家塾嚴訓孫子  
四世同居歲飢捐粟以賑縣屢旌獎七舉鄉飲壽丸  
十終

包禧字子昭遂昌人少遊郡庠博通經史嘗從龍溪先生  
私淑良知之學發明朱陸同異之旨生平好施博  
濟歲疫癘山邑艱得藥物往衢州買賑遇寡人鬻妻  
償債將別號慟出囊金以銷券妻得不鬻晚厭舉子  
業置家塾延師以訓宗族錄周程張朱要語刻行於  
世知縣湯顯祖重之爲之序

朱景和字其順遂昌人自強之子孝友根于天性言動  
準諸古人萬曆辛巳以六人考貢當首選念正貢老  
而貧遂讓之壬午中鄉舉署滋陽學諭丁內艱復除  
荏平談經程蕪多士敬信擢感恩令雅尚德化徙舊  
城禁採鑛創九龍書院皆大有利于士民者以勞卒  
于官祀名宦著求我齋類稿學卻窩迂談等書

徐棟字子登遂昌人寬厚簡默喜怒不形以拔貢授福  
寧訓復除閩縣皆以作人著聲轉諭永福值縣令缺  
檄署篆清白自持人有以子孫計勸者卽面赤謝卻  
之所著詩文甚富有虛谷彙編梓于閩

鄭補字國補遂昌人鄉賢鄭還之子幼得家傳長崇正

學稟性至孝父疾籲天祈以身代執喪哀毀骨立既葬廬墓三年邑令池浴德爲撰像贊所著有學庸行義等篇而綱目管義一書尤大有補于尹氏發明云葉恩字天錫遂昌人以吏員累官吳江主簿舉其官詞蒙化衛知事以孝不赴處鄉里持論質直鄉人構詞者得一言卽解人有過面折嫚罵不少容然無他腸以故人無憾者

周紳字文佩遂昌人裋身敦謹夙以孝聞少業儒旣長從事邑掾奉公守法令多重之授惠安尉時劉公弘道爲宰諸所規爲相與謀議民心胥悅有劉父周母

之謠居家遇荒歲出貲貸人不取其息不能償者焚其券後劉公以臬使泣浙致書存問及卒親爲文遣祭焉

包志學字而時遂昌人學增生友于好施視姪猶子歲荒出穀賑飢時痘疫流行買參普濟貧者賴以生有族女孤子無倚撫而嫁之人咸慕其高誼

鄭一桂遂昌人性行質直有古君子風家族聚一鄉食指滿萬事無大小悉爲排難解紛鄉鄰德之以子九炯貴贈承德郎江寧縣知縣

樊守字仲卿縉雲人以明經授山東高密論封江西道

監察御史耿介博雅適意林泉非公不見所著有樊山後集

李羽字朝宗縉雲人事親色養孺慕終身與兄析業遜  
腴取瘠伯兄玠進士無嗣以子繼之復讓遺業以振  
仲兄之乏見遺金于路守其人至還之有窮民逋糧  
被繫捐金代輸歲飢破困與工使得值以贍里中質  
成片言剖分皆意釋人擬之如太邱云祀鄉賢

李繼韶字仲虞縉雲人少篤學尤精三禮萬曆壬午亞  
元署無爲州學正造士得人陞浦城令以母艱歸天  
性孝友持躬敦朴無鉛華態尤善教子父子以禮魁

浙闈祀鄉賢

李彥時字子中縉雲人少入泮早歲喪母哀毀骨立有  
可憐無限傷親淚夜半和愁落枕邊句父沒廬墓啼  
號見者動容事伯兄等于嚴師撫幼弟極備友愛授  
徒婺州歸路遇有經營失利相持拚命者以束脯十  
金濟之高祖恭愨公家集被燬伯父玠早世遺稿散  
佚多方購輯破產重刻以永其傳所著有五經質疑  
讀史臆見名山業等書祀鄉賢  
丁慈字宗仁縉雲人恬淡寡營恢拓有度孝友好施精  
心二戴酣暢良知宗旨入困棘闈僅以例授楚府典

儀致政屢薦賓筵所著有五經粹語爲善集豎巖集  
鄭士弘字孟仁縉雲人廩例入成均性孝友慷慨好施  
丁年失母周淑人念孤身寡助勸育二弟曲承歡心  
經理內外以故父宦遊無內顧憂父督撫宣大遭重  
疴弘方痺疾支離聞信奔赴躬侍湯藥泣訣哀毀骨  
立生平慈腸接物坦衷仗義重禋祀則粥墓田建菴  
宇闢道路則監石埠甃長堤賑濟窮乏睦族篤姻不  
置媵妾與施孺人肅雍賓敬舉四子厚幣迎師課督  
極嚴旣抱子猶夏楚焉叔季同登賢書雖義方之效  
亦世德之徵也中年臥病一切塵務都捐築小有別  
業與二三同志以琴樽筆硯相往來曰以是寄吾懶  
亦任吾清因自命爲清懶主人初授光祿署正以父  
延綏大捷功世襲錦衣堅臥不起有古人隱遁之致  
所著有宗鏡語錄清懶窩吟稿

李洵字體習縉雲人庠生封監察御史幼失怙事母應  
氏至孝怡顏承志不露窶乏之迹外祖家替常分  
贍養之沒時典質襄事營葬如禮卽親孫不是過也  
母年八十有六洵年踰五十朝夕溫清依然孺慕  
歎曰願汝子孫世世如汝之事我叔父食貧無嗣  
養葬祭如事外祖長子燦然登第迎養宦邸恨母不

及見時歔歔流涕雖蔬果必薦迨子歸沐侍養命分  
餘祿均惠三黨九族親疏以次周卹建祖菴葺諸先  
塋菴宇多費不吝夏湖山建塔力任其成邑人士科  
名蔚起皆其功也崇祀郡邑

吳承恩字朝錫縉雲人天資警悟器宇軒閣涉獵羣書  
有冥解性至孝父鼎博雅隱居舉恩最晚稀年痺且  
眊與室人周氏壹意服勞父母捐館舍哀痛迫切居  
喪三年不御葷酒卽親素以鷄黍酌者亦不赴葬祭  
以禮識者重之居東郊結草堂書樂志論間居賦于  
壁詩才韶令工書法善丹青寫梅尤絕邑令雷公叔

聞王公楸鋸延致賓筵不應乃以望閭旌其門生不  
質直解紛蠲忿至誠無偽鄉里賢之年踰八十樂善  
不倦所著有東郊草堂雜錄醉素堂吟稿

鄭子諤字邦直縉雲人孝友直方端亮渾朴父患癰醫  
欲施刀割號痛弗忍以口吮之癰潰而愈承母志篤  
愛幼弟讓羸取瘠仲弟以顛伺遭誣挺身直其在自  
幼好讀書弱冠補弟子員有聲譽晚耽性理及左史  
諸書手錄三過以授子孫養恬怡老年德俱邵邑薦  
鄉賓屢辭不赴有古君子風

王巽字德制青田人宋理學順齋先生之裔幼入郡庠

試高等慷慨仗義教授門徒以道德相規裊躬清肅治家嚴謹恤貧賑乏好行其德有非義相加面折峻拒雖貴介強禦弗徇也後學咸敬服之以應貢卒于武林旅邸遺訓子孫無信浮屠教嘗手錄宋元綱目學者稱爲松園先生

王順度字鴻範性孝崇禮以父松園公中道告殞弟順序英敏早歲選入成均遂勤幹蠱不營仕進開義塾訓宗族生徒貧者捐貲賑之家以不振坦然自得也與配金刻苦訓子用有成立至孫魁南宮人稱世德

云

戴鏗麗水人本姓高爲瀧水訓戴公嗣遂姓戴貌朴心古家貧績學以貢授華容訓時蔡公系周髻年家寒失怙恃鏗愛其聰穎教育成進士後有聲臺中人服其知人自大治論漳州授陞松溪令廉謹自持先是筦庫吏以失藏鏗坐監守自盜心竊疑之閱庫傍地陷一竇密循其迹乃縣輿夫之寓一鞠卽承人以爲神伯子濂成進士爲郡守父子聯鑣入覲時人榮之以子比部封如子官謝政歸治家嚴肅義方凜然年近八十終

高岡字子升處州衛人文臬子坦衷率易事親孝待昆

季友愛登嘉靖壬子鄉薦初授金谿令陞臨江別駕  
轉南康俱有政蹟年甫艾念父耄盡謝政歸養性好  
施篤友誼時弟逋官賦三百金就繫卽爲代償親族  
有喪厚贖之凶年出粟賑貧乏姪貧爲婚娶舉賓筵  
三十有六麗水令樊公以世德扁其廬年九十有五  
祀鄉賢

王敦儀字應望青田人世居郡城性孝友厚重寬和與  
物無競髫年穎異小試輒爲有司所奇郡守高公憫  
其貧欲調之堅謝不受與配陳恭人孝事二親食貧  
苦志菽水承懽親病籲天祈代父沒弟幼撫教成立

盡以父產讓之閉戶窺書謝絕外事嘗下帷法海寺  
一日早回遇一人攜金銀釵釧值數十金忽暈仆懼  
爲後至者所攫立待其甦簡付之其人分謝不受有  
祖墳在芝田界展墓見人盜木恐其驚墜戒從者勿  
呵從別道回生平周人之急紆人之難忘其已之爲  
貧士也教子一中成進士迎養古田訓以廉平豈弟  
比歸囊橐蕭然雅意山水之樂而年已高不可得沒  
祀鄉賢

王三接字汝晉處州衛人醇篤溫厚天性孝友弱冠入  
麗庠父患怔忡侍湯餌先意承志父沒哀毀過常以



廩例授廣臬照磨念母老乞歸重義好施媼族待婚  
殯嘗自莊回渡石牛舟中拾遺金驗係縣胥輸官租  
物俟久不至攜歸潛代納乃粘票櫃側不使知爲已  
也家居三十餘年屢薦賓筵八十餘歲終

張率孝字立愛處州衛人家貧力學有聲郡序父爲讐  
家訪誣將置之死孝代父備受摧辱重趼走訴上臺  
寃得白父母沒哀毀踰常以易授徒成就者衆歲貢  
未選卒

陳守字子約麗水人家世業儒以恩選授貴池丞廉潔  
不苟愛民禮士扶弱抑強兩代尹入覲皆登薦牘以  
恬淡無營八年告歸林居數十載不謁公庭不履屢  
市郡守任公延縉雲李參知賓筵李曰必得陳子約  
爲介始赴郡守延見之容貌衣冠古朴真率益重其  
爲人年九十餘卒

許成義處州衛人孝友醇謹待人接物誠慤溫厚一見  
令人鄙吝盡消父病侍湯藥跬步不離屢蹶場屋以  
貢授開化訓轉望江諭與諸生講學課文不倦兩地  
俱有碑志不諼

李鶴麗水人孝友有聲庠序以貢授錢塘訓轉餘姚  
諭所至飲人以和尤精形家星曆家居蒔蘭種菊性

不能飲而與鄉耆會興趣迨然年八十餘終

汪應濂字希宋麗水人刻志力學操行醇謹孝事二親以貢授金華訓課士多所成就轉南昌諭移疾歸

葉綦字盛卿麗水人行已端方敦孝睦族撫育幼姪分產贍之俾有成立以貢任建昌訓未朞月卒

潘璋字良用麗水人心慤行端然諾不苟任蕪湖巡司爲王遂東先生所敬重權稅秋毫不染告歸囊橐蕭然長于藻鑑尤好賢禮士與從弟璠重義急公矧濬好溪堰畢盡心力東鄉賴之

梅茂清字時夫龍泉人謙謹孝友髫齡失怙苦志力學以貢任太倉諭爲大學士王荆石先生敬重致政家居絕跡公門以壽考終

何其美字汝器處州衛人英敏力學弱冠入泮督學紫溪蘇公首拔幼失怙事繼母極孝弟恃母愛不恭美友愛愈篤弟以事被繫傾囊營救鶴原之誼甚摯以貢未及授官卒人咸惜之

俞奉璋宣平人進士俞大有曾孫事親孝養睦族不吝勤施尚義周貧崇文修學月旦共推至今頌之

徐萬松字茂松松陽人幼失怙事母以孝稱動履方嚴以明經訓樵李俗好侈靡力矯之士風丕變轉授南

安紹明正學臺省交薦拂衣歸所著有吳中劍南嶺  
北諸草藏于家

蔣一麟字宗讓青田人介直端方幼失怙事母盡孝兄  
弟六人麟居長教育備至內外無間言嘗遊太學歸  
絕意仕進弟一鰲字宗元少遊庠究心印索怡情山  
水尤篤友愛兄弟共巖終身鰲子光壁髫年入泮失  
怙恃享年不永子方馥少登賢書人以爲積善之報  
厲一增字士謙青田人遊庠序督學屢賞高行七旬  
授冠帶嘗著教子語類治家摘要等書郡守鄭公贈  
以潛光詩

張文逸字朝俊青田人邑廩生醇謹博雅好吟咏事孀  
母盡孝隣家失火延及其居縣令往救見抱棺慟哭  
烈焰隨滅詢其所哭者兄棺也嘆曰天佑善良不爽  
如此所著有雲光錄藏于家

王建字仲啓青田人進士王唯元孫事父母備隆色養  
平生好施予歲飢緩其租入議以稔輸勿言息人皆  
稱爲長者族里質成片言輸服嘗就溪澣結花萼堂  
賦詩陶興尤以庭訓爲諄諄

蔣光哲字士明青田人髫年遊泮比隣火獨扶母柩出  
他無所顧歲歉佃多負燬券不取居母艱哀毀骨立

幾至滅性士林皆悲傷之

徐榮字仁卿遂昌人孝友醇雅外母家貧無歸奉養終身祭葬以禮髫年入泮試輒冠軍以貢除江陰訓課士有軌度陞南豐諭

李鏞字廷聞縉雲人性孝友以廩例入太學授鴻臚序班貌古心誠與昆季鍵鋹並四皓月旦同孚

胡寧字廷泰縉雲人天性孝友雅意詩書尤喜讀孝經子孫咸督習之自爲講解訓其鄉里粥產以賑貧乏產且盡猶孜孜不倦築館鳩族子弟肄業其中子來聘亦蜚聲黌序義方訓子孫長庚弱冠領鄉薦人以

爲盛德之報

王應瑞麗水人砥廉隅敦節義親病醵天刲股曲撫孤弟撥腹田以供蒸嘗恤窮困創渡葺橋人多稱之

王化民字育卿麗水人早失怙母何氏守孀課讀名籍儒林事母孝得其懽心嘗從學于致虛樊公岷瞻爲公貞父黃公皆以大物期之數奇不售貢後母猶存年八十餘孝養不衰授諸暨訓卒

葉節字子高麗水人隱居篤孝教子義方胥著令望陳嘉陞字貞所麗水人幼失怙事母承顏怡志年十三遊泮絕迹公門六舉優行邑令樊公欽重之

陶旦字信民縉雲人少時以事繫都察院獄有永康池姓者亦被繫遇宥池與妻俱亡一女及笄旦攜歸擇嫁彼地金良旦卒良偕女來弔白公心事比之柳下惠云

蔣光啓字士賢青田人幼穎悟絕倫天性孝友讀書窮理負笈從師數奇不售課子芳華輩並有聲黌序

謝福丁嵩義子縉雲人嵩授田州經歷死于兵幼子璫没入土官爲奴時福與妻先歸乏資留滯于途聞變遇督運姚鏜自田來號謁問故知璫所在不勝悲咽欲往尋之姚喻以險阻福曰義父不可無祀遂鬻妻

爲途費達田州求璫土官執不與日夜泣于其門半載土官之父哀其義命還璫攜歸撫之成立爲擇配以全嵩祀

陶舉字汝諧縉雲人性純學博爲多士宗任福寧州訓導時巡按施山恤刑李瑜皆舉姻友有指揮營署把總者有逆子賁脫死獄者各遺金數百請托嚴叱不受台郡二女被寇剽至閩舉收之資給送還士論高之

呂管字雲谷縉雲人由庠生贈南京銅陵令敦方朴直博學耽吟咏不信神怪性至孝痛母早逝著慕萱草

辭極哀讀者欲絕萬曆庚寅疫發狀似鬼祟鄉人苦其癘管作文禳之病者霍然後又有童子神憑之經烟火食能知吉凶管召見叱禁不得爲妖是夕童子歸夢神泣告曰吾犯呂公怒將去汝自是鬼絕响其正直如此所著又有崇孝集

田學周字以禮縉雲人由太學生授鴻臚序班正直謙朴廬墓不仕平生慕義樂道人善雖衾影無越禮子正春官司李戒以尚德緩刑正春以俸入爲壽必詣所以捐其半置田助宗祠爲祭祀需曰俾吾祖宗族人世世拜朝廷賜鄉人有以緩急告無弗予尤喜解紛排難杜塞訟端里爲之化年七十有奇六舉鄉飲卒之日遠近流涕

李大夏字允和縉雲人由增例入太學父任遼東叅軍時遼事方殷大夏聞警萬里奔省辛艱備劇比至父奉差旋京病甚大夏躬視藥石衣不解帶無力移櫬撫按憐其孝破格給勘合還服闋應選以母老不仕竭誠奉養母年九十二終平生嗜山水好讀書所著有容膝齋集

李永明字覺初縉雲人銀臺鍵公子修飭品行無統袴氣幼補弟子員改太學官鴻臚不私干謁能紹清白

風念親老歸養委曲承志以孝聞事庶母異母孀婦  
恩禮周悉不苟交交必有道初終弗渝其誠愨如此  
尤贍才淹貫經史善詩工書所著有北遊艸信芳園  
集竹下吁囑仙都誌王季重紀有頌其詩恨不見其  
人云

李我懷字克順縉雲人縣庠生入太學選崑山縣丞居  
邑頗囂相國顧秉謙以歛怨召焚懷爲調處曲當紳  
民共服遷京衛經歷行橐蕭然又遷楚都司經歷不  
赴平生謙厚和順事繼父母以孝稱

呂有音字太希縉雲人郡庠生誠中朴外言訥行方母  
早喪著陟屺歌百二十章又集古孝行一書喜賑貧  
有膳親不足者周之一日父苦水道病醫者云須以  
藥氣導入方愈否則不治有音泣下親以口試如醫  
言父病旋愈鄉閭稱之教其子皆騰聲庠序

麻國良字叔賢縉雲人事親婉容承志友愛其弟分財  
產讓弟擇其美者持已端慎謙和尤喜勸善釋爭鄉  
黨稱其爲人

李過培字因我縉雲人性至孝能持大體讀書必求義  
理少時父病俗有迎婦充喜之說培不允父故哀慟  
盡禮鄉曲嚴敬之兄禮部初泉公以文足起衰毅能

振懦目之以二子屬門下每訓後生各如高下皆有長益一時知名多出其門精舉子業中年患脚不窺園者十稔著春秋約旨易註增刪各十二卷生平不事神佛曰吾奉孔氏教足矣踰耄先一月令妻率子孫序立聽遺訓言畢云某日時將去卽辟穀惟飲茶而已二子進食曰吾欲淨內心并淨外身何事強我至期香氣滿室有鼓樂車馬之音世傳爲李仙飛昇云

陳有道字子安縉雲人賦姿英敏博極羣書髫年遊泮試輒優等後以喪親哀毀成疾二弟孺弱道爲治產

業議婚娶又身訓督之性溫厚博愛善施遇公事持論侃侃義形于色晚年構青玉堂頗肆志詩歌而尤長箋翰雖毫不釋卷手書精楷如故卒年八十二所著有養生真訣戒殺文及青玉堂吟稿

蔡隆遠字思泉麗水人性直行敦慷慨周急任安慶知事政績茂著致仕家居儉素養重不問戶外惟課子誦讀成名年八旬終

蔡光奎字卻北青田人資性醇謹孝友盡敬居鄉排解紛難片言折服博通羣書詩有唐人格調猶子芳馥登鄉薦所著有世僻糾行世



留應舉字心所青田人志操古朴敦尚孝弟有彩服踏  
歌春晝永填篋度曲午風清之句延師訓後講明經  
術當道重其齒德壽八十六終  
鄭仕彥字孟美縉雲人性直心慈任辰州叅軍值歲飢  
煮粥賑濟全活甚衆居鄉重義與弟士廉輩白首怡  
怡子孫化其家教  
葉以章字振凡松陽人萬曆癸巳選貢任東平州同陞  
衛府審理正平生孝友慷慨賦歸倡義建學賑飢瘞  
幣年八十六知府鄭奎光造廬延舉飲賓著有詩文  
行世配許楊二公祀四賢祠

朱九綸字廷重遂昌人用化冢子慕薛文清之學以文  
章受知丁哲初湯若士兩公爲吳伯霖首座與西安  
徐子卿齊名泰昌庚申覃恩應薦讓與老友乙丑始  
以歲例訓臨海首宿泊如仍慷慨慕義有貧士王生  
以逋賦爲縣卒辱逮而杖之隨出俸代輸遷諭柳城  
開誠砥切士欣得所宗時義烏沈尉夫婦闕殯搜橐  
數十金畀其子以櫬歸教授紹興捐貲刻功過錄學  
使者頒行各郡生平不解貨殖餼脯之入悉歸公帑  
期親喪哀慕如孺子析箸聽三弟取腴甲申國變率鄉  
人爲舊君服夙善古文詞工八法晚尤丹鉛不倦著

州府志 卷之三  
懶雲集子家瓚拔貢累中副榜有文名  
陳民信字成之縉雲人由明經任德清訓陞光澤諭署  
縣廉惠有政聲捐貲改學士立碑祀之再轉銅仁府  
授以途遙不赴晚益耽書史絕迹公庭登賓筵者九  
鄭邦相字珍之遂昌人性孝友仗義解紛有王彥方稱  
筮仕河南府照轉山西大同府照奉委散兵糧查各  
堡軍器清慎多賢聲晉民德之致仕歸事繼母色養  
不倦讓產厚其姪不自取盈年踰古稀卒

徐朝偉字士稚遂昌人質稟純和性篤孝友嗜書史薄  
聲利生平無疾言遽色由歲貢訓新昌年已七十砥

切多士轉諭江右新昌卽賦歸杜門課讀邑令許君  
延賓筵旌爲德門人瑞

吳自明字元貞龍泉人幼有至性事父母色養備至友  
兄弟同居怡怡待里黨有恩仗義輕財排難解紛人  
得其片言卽服耽習文藝課子義方期于成立值兵  
囂寇亂憤鬱而卒

周士廉字介夫遂昌人少餼郡庠負俠骨與友徐懋厚  
俱受知湯海若公厚病瘵不起屬以嗣事廉慨諾厚  
妻王氏爲立孤事間闕百楚廉挺身左右以女字焉  
後王氏從容就節復爲申控題請豎貞節坊人比之

為程嬰事詳奇節錄中遂邑大害在里甲廉極陳諸  
 弊得禁革以歲薦訓湖庠諭湯溪補任漳平教諭年  
 七十五卒  
 王文雅字時正遂昌人以歲貢授常山訓雅意好修飲  
 人以和諸生束脯不計唯以德行道義相勗後赴京  
 改選諸生戀戀不忍舍為立石頌教澤云  
 時可諫字君可遂昌人生而穎雋不凡長沈心食古弱  
 吳冠儀郡庠邑令湯海若重之由歲貢訓進賢諭安福  
 授紹興三任師席德造譽髦投老歸林膺賓筵外不  
 入公庭年七十二終

隱德

渡蟻放雀偶事也而起念無私天必佑之佛出  
 種德豈如救死扶傷易曰積善書曰惠迪有以  
 哉

劉濠字浚登青田人世居南田仕宋翰林掌書元初林  
 融起兵興復融戰死元遣使至境上糾察餘黨盡殺  
 之鄉豪挾仇投籍使者逮無辜至萬餘人濠適往謁  
 閱籍知狀歸悲憤不能就席會天大雪因孫燭計具  
 酒肉邀朝使宴飲至夜沉酣翼臥小樓探袖取牘錄  
 巨魁二百人懷之積薪樓下縱火延燒及樓使者脫

走因出懷中二百人授之朝使馳上命下止戮如濠  
所錄存活無慮萬人濠生庭槐究極天文地理陰陽  
醫卜諸書爲太學上舍庭槐生爚爚生基封誠意伯  
古云活千人者子孫必侯劉之世世食報也宜哉  
王允卿字成之松陽人尚義好施嘗往枯城索債其家  
夜遣妻叩門卿閉門不納遲明卽還不復索每寒且  
視鄰屋不烟者密以米置之歲飢山民煽亂輒私議  
曰我等至縣必驚西門王朝奉奈何遂終不入邑民  
賴以安世有蜀西門黃承事之比子唐珪至顯官  
陳德載青田人至正避寇多歷險阻形于詩題曰山村

雜興有二詩期待子孫後孫詔果登會元栽芋詩  
區里饒田早下栽綠芽纔放旋鋤開添泥善護兒孫  
長看取秋高撥大魁栽桂詩曰雲邊移得數株來人  
老花應次第開倘到子孫攀折日也須道是阿公栽  
人謂之詩識其種德有自矣

金善字仲與麗水人洪武初由人才爲行軍掾史于軍  
前活人甚衆後陞乾州知州孫愷曾孫文忠信元孫  
祺俱顯人以為陰騭所致  
何允恭字克讓麗水人醇朴寡言笑鄉人無貴賤老稚  
嚴事之事父母以孝聞厚恤甥孤克敦友愛尤好善

處州府志 卷之二十八  
喜施家世業醫允恭益張其業每晨與袖藥餌視疾  
以次徧及不責其報獄中苦疫施藥療之平生所全  
活不可數計至今鄉邦猶誦其德祀鄉賢子珙孫鏜  
別有傳

吳則宣平人以巡檢平賊功天順八年陞華亭主簿明  
察善斷下無能欺巡撫滕公雅善之上海乏令遣署  
事清負租一萬八千石設策賑飢民八千餘戶值海  
溢爲災復陳情蠲租六千餘石士民德之作借賢肩

民詩

見松江府志子  
仕偉爲顯官

項森字子秀遂昌人祖泗父孔賢皆以積善稱至森益

弘其烈業儒弗售棄去精岐黃術以施藥濟人爲事  
萬曆初邑旱飢鬻田賑粥多所全活其輕財重義類  
如此森祖置四茶亭田若干歲久爲豪強侵沒森悉  
贖之嘗以已貲買山一所堪輿家曰是善地也宜塚  
盍自營之則以葬其父母後二子以經學顯邑有相  
構爭者得其言立解衆皆推服比之王彥方云

張八公龍泉人饒于財樂善好施鄉人德之號張八佛  
產分二子每歲賣穀錢六十一把其歲歉鄉價增八  
十其子亦增之八公坐于門看糴者出問之價曰畧  
增些少公悉以錢還之自後其子價亦不敢增其篤

于義如此至曾元皆登第事見為善陰隙書

*[Faint bleed-through text from the reverse side of the page, including names and dates.]*

尚義

橋渡濟行菴亭置息隨其大小皆稱義舉策其名標其行可以破慳愚可以興善類并可以鼓庸俗之好名者

李端履縉雲人嘉熙庚子飢告其父楚孫曰人飢且死能獨飽耶父曰兒其勉之會郡募發粟七邑無賑者端履首應命賑之復移粟他邑事聞授樂清簿旌其里門曰樂善坊

潘好古字敏修松陽人入成均與名士遊值歲飢傾廩濟之洪水至好古與同處者數十人諭舟人先濟餘

人舟人曰吾德公故冒險來好古曰濟彼猶濟我也鄉人義之

王灌松陽人乾道中以賦役繁重首倡義役役先後視籍田多寡視等行之三十年而訟不抵于有司

楊大同松陽人素業賈寓武林邸舍忽聞隣哭甚哀詢之乃王尉失囚獲罪鬻女以贖故相泣別大同遂出貲以貸尉他日大同壻遂昌鄭克寬登進士調鄂州監酒時鄂守卽王尉也克寬以公事候門守覺其鄉語類栝問曰識楊大同乎曰妻父也守曰尚在否曰卒矣惟妻母見留此守曰汝爲我迎楊媪來至則坐媪于堂率子女羅拜以母事之因語其故置克寬于幕以薦之

程大雅字正之松陽人素尚義遇歉常捐廩以惠鄉鄰積雪起視鄉鄰不火者密以米置之門雅古籍二都助田三十畝以資都役人有鬻妻兒者以財帛周之其人以荒山一區爲報大雅收以葬親卽今五龍搶珠地也後子孫名登顯要人以爲陰隲所致

吳亨松陽人性倜儻尚節義洪武初以浙東副元帥石抹公命出資財築處州左渠城五十丈後洪武十四年縣西橫源山民倡亂縣帖下亨率鄉人逐捕其黨

閭里咸賴以安繼又出私帑造船于本縣金梁烏石  
二渡以濟行者鄉人至今稱焉

劉原熊松陽人世爲蛤湖人父惟賢徙居澄川捐貲倡  
築獨山百仞堰建永安橋置澄川渡立祭田以祀先  
修德行誼遐邇具聞正統間陶得義等倡亂男女避  
難于橫山寨寨近澄川守寨者素聞原熊剛毅各捐  
簪珥求禦護熊卻之曰賊因財而致亂予復因亂而  
受財相去幾何卽椎牛注酒集鄉人熊執殳前戰賊  
懼退居城北夜有攜妻子東逃者賊知次日乘機劫  
寨原熊又掖兵力戰于野斬賊魁四級熊亦陣亡鄉

人哀之祀于社

包麟字天祥松陽人以貢授羅源訓先禮教後文學人  
仰其高誼羅源有賊劫庫宰夜出逃麟主庫收其餘  
篋封識無避嫌人亦信之歸老極貧一日忽沐浴辭  
親族卽終

周子輝字彥華遂昌人弟子忠永樂初被誣當死連坐  
妻子彥華謂妻俞氏曰吾弟旣死雖有二子尚幼未  
能保其必嗣若長姪與母俱就死吾忍吾弟弗嗣乎  
妻曰以吾次子孟曉代之彥華曰是吾意遂以曉往  
竟刑于市曉方十四歲卽慨然從命尤人所難彥華



與妻愛其二子孟曦孟顯若已生後俱長成復以所置產均分子姪鄉人義之以爲今之伯道云

葉榮字本仁麗水人府學增生績學宏深構文醇正卒以數卷弗售而立心制行大有過人朋友鄉隣稱貸者不下百數輩死不能償者焚券而恤其孤親戚宗族待饋者無慮十餘家貧不能娶者助婚以繼其後督學獎之郡守旌之真敦行之士允符輿論者

陶標字光範縉雲人力敦古道動有準繩早喪母哀毀骨立葬祭循理中外以孝稱司理葉公材旌其門曰孝行撫孤姪如子分已業與之家法甚嚴著有怡椿

堂稿栢軒文集昭遠集

范威縉雲人慷慨好施事父母孝諸弟幼拮据成家同爨五十餘年子孫守其家法惟謹屢舉鄉飲壽九十

三

周瑞縉雲人性直行敦孝事嫡母傾產助伯兄完公賦嘗途拾五十餘金訪還原主人皆高其義云

葉以然字懋春遂昌人讀書善記以母久病徧請名醫因盡得其術兄弟五人各異爨者五十餘年家始清素晚以醫致充裕仍以均諸同產有餘則以周貧乏婚葬及修理橋梁道路生平用藥所活者多而不責

其報且賑不能具藥者鄉人咸敬信之

蘇廷榮遂昌人家世業醫至榮益精其技歲大疫遍行  
診治貧不能具藥者施之龍泉陳令得疾請療道拾  
囊金七十兩坐候失主半日不至前至十里許有赴  
水幾危者拯起飲以藥俟少甦詰之乃徽州木商汪  
榮卽失金人也問其故則曰金旣失矣奚以生爲驗  
其賬數皆合遂全畀之至龍泉投劑令愈聞茲事加  
敬因贈以詩有常施篋囊君臣藥笑擲人遺子母錢  
之句壽八十終與鄉飲一十三次

周李遂昌人篤于孝友尚義好施族黨中婚葬有不舉  
者親爲經紀歲設輪粟備賑有佃戶郭得祥通租積  
百餘石納女充婢以償卻不受更予衣米遣嫁之負  
錢者貧不能還卽焚其券當道屢加獎額與蘇廷榮  
俱書于旌善亭

鄭重字廷威縉雲人封主事進封吏部文選司郎中太  
常少卿倣儻無畛畦待人嚴縝過必面督已則坦如  
事父鄉賢公孝課諸子經成成名身三受封不作貴  
侶態治園林村結耆英會怡情山水間以畫壽

華化民字子與遂昌人性孝友學論孫懋昭廣開  
界其地欣然予之不受值建茶亭于茂林堂拾

湯平生得異人授治心氣方修合普施理刑袁公遇  
春舉之賓筵鹽院胡公繼升賜扁給冠帶年八十三  
葉以萃字仲秀遂昌人好善樂義建育英樓以教族姓  
捐租七十畝爲膳置渡船龍口獨山焦灘三處各捐  
租倩給舟人邑北東梅橋二十都獨口橋圯壞咸以  
石易之人免病涉讓吉穴以厝其兄爲笑姪婚娶按  
院金公忠士嘉其善行給扁冠帶以子焯贈京衛經  
歷

包志道字惟一遂昌人幼穎異一覽數行下髫年餽廩  
學官聲名滿中歲嬰疾嘗築侵雲嶺根石橋大拓  
西嶺茶亭邑人以義稱之甫及貢而卒

鄭文誥字天章遂昌人幼讀素問靈樞諸書忻然有得  
遂精醫術不責報尤急貧窶人疾苦晚授太醫院吏  
目嘗置定溪義渡以濟病涉洞怒噴茶亭往來德之  
梁仲彩字邦相麗水人恂樞醇厚孝事母溫清惟謹友  
愛四弟怡怡無間延師訓弟姪必從豐腆紳衿濟濟  
皆自彩濬發其祥排難解紛片言羣囂盡釋月旦共  
推之

張愛字子仁麗水人性篤摯事母菽水承歡朝夕匪懈  
兄弟合爨擇師儒以訓宗族焚券恤乏施棺掩骼修

路以便往來里閭稱之

張鶴翼字鳴臯麗水人早孤事母以孝聞苦志力學與從兄鳳翼文行相砥勵家居河埠有徽商以幣物數笥見寄往甌遂販適家遭回祿寧緩已物盡出所寄商聞變意不可復得比至一無所失喜出望外不勝德之生平以禮義自守雖數奇不偶布衣終身未嘗一屈膝公庭與物無競人亦莫忍犯之庭植花卉自娛花下酒酣得家貧花富貴酒淡興狂豪之句人多誦之

陳嘉鳳字于祥麗水人早入縣庠性敦孝友總角失恃事父及繼母得歡心嘗隨伯父宦遊閩清岬念深力辭歸省父因其孝陰擲餘資悉讓于兄至喪葬祭祀倡先盡禮屢旌優行教子若孫皆有聲庠序

管潮字時信青田人禠躬長厚隆慶庚午飢潮輸穀一百二十石以賑貧乏縣令榮以冠帶扁其門曰爲國賑民張克武青田人肫篤醇謹萬曆戊子己丑歲飢郡縣議賑獨先輸穀一百于官衆多樂從之縣令旌爲尚義之門屢舉賓筵辭不赴

王可諒字友卿遂昌人弱冠補弟子員生平重然諾負意氣尚義輕財嘗葬族人之暴露者宗黨稱之延請

賓筵不赴年八十六而終有詩集行世  
留夢鵬青田人邑庠生取予不苟孝友咸孚鄉約首推  
善人學道素彰優行壽踰八十屢薦賓筵

李應暘青田人由歲貢少聰穎篤志勤學制行端方年  
二十六失偶遂不娶鄉人重其義至今稱之  
周應化青田人性慈祥好行其德遇異人授以醫訣方  
書施藥濟貧尤精治痘恩施干人所不及知己亦不  
望其報一經訓子克有成立人共稱之

黃緝遂昌人族敦孝友制行純良以例授任廣西南寧  
衛經歷居鄉三旌善行五推賓筵壽八十七終

鄭廷康遂昌人禔躬古朴純懿有長者風安貧教子孝  
友刑家義敦然諾駿發所生人以爲厚德之報以子  
貴封給事中

葉德佐字廷輔松陽人少孤家貧事母至孝天性長厚  
不侵然諾好施予恤緩急不責其報內行尤甚不取  
非義不視邪色日惟課子誦讀勉以忠孝廉節爲本  
不圖溫飽以故子元芳令崇義有聲蓋得于庭訓也  
年幾九十示期告終大司寇沈何山公有文稱之

鄭秉貢字文元遂昌人年十五遭父被仇害身徒跣哭  
訴當道縣令池公浴德鑒其誠斃三人杖下孝聲動

一時由是家益落遂服賈每歲必延名儒訓子一課  
一讜俱有聲膠序

張學甲字思過麗水人邑廩生少有文名爲督學文遠  
許公所鑒賞潰兵掠括鄉男婦避亂于凰山後寨甲  
出爲兵獲給之曰引我至寨當免爾死甲厲聲曰吾  
何惜一人之生而免衆鄉人之厄遂自竄深淵而歿  
人義之

葉伯仕字行可麗水人邑廩生博覽書史學行兼優丙  
午赴科途遇商人發麻被拐貨轄擔夫賠償貧無所  
措父子俱思自溺仕出已資五兩代還全兩命旣而

治病在省夢神人增壽一紀

陶邦用名銑邦用其字也以字行縉雲人性公直不阿  
重義輕財鄉人貧者賑之有從弟被冤破家與之伸  
雪尤明易學

詹應霆字體震松陽人布衣能文纂修家乘爲府掾時  
有無辜受冤者府尹欲置極刑爲力白乃免時尚乏  
嗣忽夢神人告曰汝能活人陰德不少錫爾胤且錫  
爾程後任廣東雷鄉親見子孫食餼壽至耄

詹立敬松陽人性尚節義捐資築獨山橋爲松溪尉見  
西門外水漂骸骨積野買義塚埋之復鑿井以濟孤

老上臺謂其能惠起民疴委督大石橋仍捐俸鳩工  
松溪民勒石建祠至今祀焉  
包可成字汝材遂昌人天性孝友與人謹厚家貧習舉  
子業弗售遂棄去篤志實修授徒鄉里訓子及孫並  
餼于庠生平仗義釋紛每周旋人患難所全活甚衆  
兩沐院獎屢舉賓筵以壽考終  
朱九職字廷任遂昌人性孝友輕財好施崇儒重道捐  
資義塾造就黨俊造舟龍鼻頭濟渡置租二十畝凡  
茶亭橋梁道路圯廢者修建不惜重費遇歉賑飢施  
藥救病周急掩骼倡義全輸解紛息訟生平與物無  
競樂善不倦

朱國泰字于保遂昌人性孝友六歲失怙卽嗚嗚孺慕  
逋償輒焚券免之中丞高公嘉其孝義給冠帶獎勵  
以稀壽終

葉有光字守元青田人性倜儻通經術捐廩賑荒貧者  
待以舉火修橋梁葺文廟卹甌民之鬻妻女者郡守  
鄭公作世德傳美之

王國懋字士勉遂昌人授晉江圍頭巡檢爲郡守孫公  
朝讓所器委以獄務飢疫並至懋獨割俸施藥分饘  
賑飢闔圍賴之生全因病乞歸

夏應純字心葵青田人世居小奕有厚德萬曆己酉洪  
水衝塘堰殆盡純獨捐貲修築灌田四百畝鄉人德  
之年登八十子孫昌茂人以爲義行之報

葉傳字南岳松陽人庠生倜儻豪舉伯氏伸緣事忤令  
令具申傳適遊學于省自負年力改仲爲傳代禡及  
其兄尹儀真絕不望報解推惠人無德色受者罕識  
其面子選功志義不羣且鬻產教子若孫有父風

陳應時字登鰲龍泉人性慷慨好義任武進丞轉廣德  
州判任滿回籍山寇竊發闔邑不寧時捐產募兵禦  
之後爲寇所獲夫婦俱遇害

鄭一寰字調元遂昌人體貌魁梧學識該洽爲人排難  
解紛族里推爲祭酒晚課三子並有聲庠序

華存理字仲察遂昌人孝友敦行內外無間正統七年  
歲凶出粟賑濟旌爲義民子孫繁衍多列冠裳享年  
八十七歲

華知良字恒宇遂昌人幼篤孝友長而睦族好施賑乏  
崇正間舉鄉賓逸居山谷有隱君子風年六十五卒  
包經武字君揚遂昌人秉性純厚好義樂施事後母以  
色養更以舉業成昆弟壘篋攸協且周人之急崇正  
丙子歲歉北鄉尤甚全活百餘人及助茶侵雲嶺至



今膾炙人口有盜其家者不較途拾遺金候失人而歸焉其子生員長明克念厥緒禊躬有父風品行卓異可與古人比烈

包英滄號後川遂昌人性朴行端夙以孝友聞鄉間多爭鬪勸以息訟更好賑施待以舉火者數十家足不履城惟知家塾垂訓故子尚雲孫家駿繼登黌序代有古風

梁應期宣平人歲凶捐穀四千石設棚煮粥照人口均給存活無算子一鴻克承父志建高浦橋於新嶺創寺施茶以濟行人

李繼澤字濟字縉雲人父稱素封澤好任俠盡散其積然奉甘旨必豐潔不以艱難傷父心應試武林與潘姓商同舟潘主僕染疫僕死同舟人皆棄去澤獨爲調藥餌潘得愈出金七百分半謝之卻不受商以澤無子欲攜女爲澤育子復力拒之月餘澤妻陶氏忽自娠

王任祖字覺斯麗水人輕財仗義有鄉民李官壽家貧鬻妻任祖傾囊贈之不致分析且諱以夫婦大義不信浮屠遺命不作佛事

汪起綵字震先麗水人與兄起紳同事孀母以孝聞康

熙甲寅閩逆陷處奉母避兵陳寮時郡司馬趙瑾亦  
在紉謂兄曰此義不降賊者當保全出之山中人皆  
以趙在賊必至欲縛獻之商之綵綵曰此誠遠禍不  
若護而去之遂同送出山趙得生越明年趙隨親  
藩統兵恢復召綵兄弟欲官之固辭不受趙後官真  
定奉金爲壽又力卻之趙無以報乃爲其母上苦節  
之旌

陳天錫字公純遂昌人歲貢性友愛好周人急常贈金  
完貧人之室父母皆八十餘喪葬盡誠撫幼姪教養  
婚娶如已子樂託不喜交遊詩淡遠有致人爭誦之  
章毓賢字爾哲宣邑庠生閩變後人散出荒本鄉逋賦  
例行照丁攤賠入畏糧累生子有不舉者賢變其家  
貴代爲完納康熙四十四年歲飢市無粒米賢特舉  
家食粥省所餘以濟窮餓好施樂善至今傳之